

■ OPINIUN

Pertge la lescha da linguas?

La lescha da linguas, approvada unanimain dal cussegl grond ed en votaziun ils 17 da zercladur, na pertutga betg mo il dretg chantunal. L'art. 70.2 da la constituziun federala tuna: «Die Kantone bestimmen ihre Amtssprachen. Um das Einvernehmen zwischen den Sprachgemeinschaften zu wahren, achten sie auf die herkömmliche sprachliche Zusammensetzung der Gebiete und nehmen Rücksicht auf die angestammten sprachlichen Minderheiten.» I sa tracta pia d'in'incumbensa federala che mintga chantun duai ademplir sez. Co ch'el fa quai, tutga a sia atgna competenza autonoma. Parlament e regenza dal Grischun han fatg lur duair; il suveran ha uss il pled. Tge schabegia sch'el di da na? «Nagut», din vuschs indifferentas u da levsenn. Ma i n'è betg vair ch'ins astgass lura metter da la vart il pensum da fixar ils linguatgs uffizials dal chantun. Quai ans fa endament l'artitgel da Martin Killias e Daniel Thürer, dus professers grischuns da dretg, en La Quotidiana dals 18 da matg. Ils auturs punctueschan «ch'ins stoppia resguardar

tar la politica da linguas cunzunt la lingua tradiziunala». Quai fa la lescha en votaziun cun gist quella norma che videnta ils promoturs dal referendum: «Ina vischnanca tradiziunala rumantscha ha da restar ina tala uscheditg che la cumpart dals abitants che pledan rumantsch na croda betg sut 40%». Questa cifra resulta d'in «cumpromiss a disfavur dal rumantsch» ch'ils auturs resguardan tuttina sco «ina schliaziun equilibrada». Ma senza lescha na datti nagina schliaziun; lura «fissa documentà ch'ins na po betg spetgar dal chantun ch'el frainia entaifer temp nizzavel l'erosiun dal rumantsch. Per il legislatur federal fiss quai senza dubi in motiv d'emplenir questa largia cun atgnas prescripziuns» – tenor l'uscheditg princip da subsidiarità. «Igl è impurtant per ils Romans ed ils Tessinai d'impedir ch'il tudestg sa derasia vinavant sin donn e cust da las linguas [neo]latinas». In'intervenziun federala fiss gist quai che l'autorità constituenta ha vuli evitar cun surlasschar als chantuns da tscherner sezs lur linguatgs uffizials. Cun in «gea» a la lescha

da linguas svaniss in motiv relevant d'ingerenza da Berna u Losanna. Killias e Thürer allegheschan in auter argument: «Il mender fiss il donn politic per in chantun che ha adina mussà plain luschezza sin sia trilinguitad. Il rumantsch è la pli pitschna lingua svizra, (...) ina lingua che n'è betg entginada d'in grond spazi cultural che la sustegna (...). I fiss ina gronda illusiun da crair ch'ins n'intraprendess nagut ordaifer il Grischun sche la pli veglia lingua svizra vegniss liquidada.» Glion ha gist ditg «gea» a la scola bilingua rumantscha-tudestga. Ch'ins fetschia mo endament il grond dumber da delegaziuns ord tutta sort pajais che vegnan a s'instruir tar nossas instituziuns chantunals davart la convivenza da plis linguatgs! L'Uniun da cuminanzas etnicas europeanas ha vuli sco parsura avant diesch onns in Rumantsch ed ussa puspè in Rumantsch. «Noblesse oblige», di in proverbi franzos. Datti in pli bel titel da noblezza che la ritgezza spiertala che deriva da la pluralità da linguas vivas?

Guiu Sobiela-Caanitz, Ardez